

海

國

圖

志

海國圖志卷三十

西南洋

邵陽魏源輯

中印度沿革

原無今補輯

漢書烏弋山離國去長安萬二千二百里不屬都護戶口勝兵大國也東北至都護治所六十日行東與罽賓西與犁靬條支接烏弋地暑熱莽平其草木畜產五穀果菜食飲宮室市列錢貨兵器金珠之屬皆與罽賓同而有挑拔師子犀牛俗重妄殺其錢獨文爲人頭幕爲騎馬以金銀飾杖絕遠漢使希至自玉門陽關出南

道歷鄯善而南行至烏弋山離南道極矣轉北而西得

安息

案烏弋山離在罽賓之西犁鞞條支安息之東南其爲中印度無疑俗重妄殺佛國始見于史故以

冠中印度之首漢初身毒未通于中國故語焉不詳

後漢書天竺國一名身毒在月氏之東南數千里俗與

月氏同而卑溼暑熱其國臨大水乘象而戰其人弱於

月氏修浮圖道不殺伐遂以成俗從月氏高附國以西

南至西海東至槃起國皆身毒之地

全傳已見前五印度總考茲不重錄

范蔚宗西域傳論曰西域風土之載前古未聞也漢世

張騫懷致遠之畧班超奮封侯之志終能立功西遐羈

服外域自兵威之所肅服財賂之所懷誘莫不獻方奇  
納愛質露頂肘行東向而朝天子故設戍亡之官分任  
其事建都護之帥總領其權先馴則賞贏金而賜龜綬  
後服則繫頭纓而釁北關立屯田於膏腴之野列郵置  
於要害之路馳命走驛不絕於時月商胡販客日款於  
塞下其後甘英乃抵條支而厯安息臨西海以望大秦  
拒玉門陽關者四萬餘里靡不周盡焉若其境俗性智  
之優薄產載物類之區品川河嶺障之基源氣節涼暑  
之通隔梯山棧谷繩行沙度之道身熱首痛風災鬼難

之域莫不備寫情形、審求根實、至於佛道神化、興自身  
而二漢方志莫有稱焉、張騫但著地多暑溼、乘象而  
戰、班勇雖列其奉浮圖、不殺伐、而精文善法、導達之功  
靡所傳述、余聞之後說也、其國則殷乎中土、玉燭和氣、  
靈聖之所降集、賢懿之所挺生、神迹詭怪、則理絕人區、  
感驗明顯、則事出天外、而蹇超無聞者、豈其道閉往運、  
數開叔葉乎、不然何誣異之甚也、漢自楚英始盛齋戒  
之祀、桓帝又修華蓋之飾、將微意未譯、而但神明之邪、  
詳其清心釋累之訓、空有兼遺之宗、道書之流也、且好

仁惡殺、獨敝崇善、所以賢達君子多愛其法焉。

魏書唐書宋史

已見五印度總考不重錄

明史沿納模兒其國在榜葛刺之西、或言卽中印度、古所稱佛國也。永樂十年遣使者齎敕撫諭其國、賜其王金絨錦、金織文綺、綵帛等物。十八年榜葛刺使者懇其國王數舉兵侵擾、詔中官侯顯齎勅諭以睦鄰保境之義、因賜之綵幣。所過金剛寶座之地、亦有布施。然其王以去中國絕遠、朝貢竟不至。

金剛座之地見佛經及大唐西域記此中印度無疑

西域圖志曰、愛烏罕東南接痕都斯坦部、漢書南道西

踰蔥嶺則出大月氏與今愛烏罕方位相符而痕都斯  
坦爲古罽賓國愛烏罕南與相接亦與漢書大月氏南  
接罽賓之說合惟境壤相接是以貴霜大得滅罽賓而  
有之也罽賓與北印度接五印度卽五天竺國范史稱  
貴霜王于滅罽賓後并滅天竺亦其境地毘接之明證  
案以大唐西域記考之罽賓當爲克什彌爾之地卽北  
印度而痕都斯則中印度也愛烏罕爲大月氏南境而大  
月氏則北有大夏又有兼又班書稱大月氏都媯水北  
北印度之西境此全誤  
魏書稱其都馬許水隋書稱其都烏許水烏許與媯爲  
音之近烏許與馬許則字之譌也范史又稱天竺在月

氏之東南天竺爲今西藏亦適當愛烏罕東南境據此

斷以愛烏罕爲月氏故壤無疑

源案以西藏爲天竺故以痕都斯坦爲屬賓耳

謂屬賓尙非北印度愈岐愈遠皆與○御製五天竺說不合惟謂愛烏罕爲月支則近是

又曰痕都斯坦在拔達克山西南愛烏罕東

漢書作東南

工治玉以水磨成器最精爲內地所勿逮舊於葉爾羌

貿易乾隆二十五年頒勅書賜物通市如故其地蓋

北印度交界北極高二十九度十五分距京師偏西四

十五度五分當爲古屬賓國地

案屬賓卽北印度而痕都斯坦則中印度不當

混爲一也痕都一作溫都



東印度沿革

原無今補註○明史作榜葛刺此外西夷書圖或云孟加臘或云孟加刺此

或云滿加塔或云明呀刺或云明絞弊皆字殊音同其北境有古里琅里坎巴又東隔海口之河故葛蘭等國皆東印度境惟緬甸在印度外

明史榜葛刺卽漢身毒國東漢曰天竺其後中天竺貢

於梁南天竺貢於魏唐亦分五天竺又名五印度宋仍

名天竺榜葛刺則東印度也自蘇門答刺順風二十晝

夜可至永樂六年其王嚮牙思丁遣使來朝貢方物七

年使凡再至攜從者二百三十餘人帝方招徠絕域頒

賜甚厚自此比年入貢永樂十二年及正統三年凡兩

其麒麟百官表賀自是不復至其國地大物阜城池街市聚貨通商繁華類中國四時氣候常如夏土沃一歲二稔不待耔耘俗瀟灑有文字男女勤於耕織容體皆黑間有白者王及官民皆回回人喪祭冠婚悉用其禮男子皆薙髮裹以白布衣從頸貫下用布圍之厯不置閹刑有箠杖徒流數等官司上下亦有行移醫卜陰陽百工技藝悉如中國蓋皆前世所流入也其王敬天朝聞使者至遣官具儀物以千騎來迎王宮高廣柱皆黃銅包飾雕琢花獸左右設長廊內列明甲馬隊千餘外

列巨人明盔甲、執刀劍弓矢、威儀甚壯。丹墀左右、孔雀翎傘蓋百餘、又置象隊百餘於殿前。王飾八寶冠、踞殿上高坐、橫劍於膝。朝使入、令挂銀杖者二人來導、五步一呼、至中則止。又挂金杖者二人導如初。其王拜迎詔、叩頭、手加額、開讀受賜訖、設絨毯於殿、宴朝使、不飲酒、以薔薇露和香蜜水飲之。贈使者金盃、金繫腰、金瓶、金盆。其副則悉用銀。從者皆有贈。厥貢良馬、金銀琉璃器、青花白瓷、鶴頂犀角、翠羽鸚鵡、洗白苾布、兜羅棉、撒哈刺糖霜、乳香、熟香、烏香、麻藤香、烏爹泥、紫膠、藤竭。

烏木蘇木胡椒麝黃

宋史丹眉流國東至占臘五十程南至羅越水路十五程西至西天

三十五程北至程良六十程東北至羅斛二十五程東

南至閩婆四十五程西南至程若十五程西北而洛華

二十五程東北至廣州一百三十五程其俗以版為屋

跡足衣布無紳帶以白紵纏其首貿易以金銀其主所

居廣袤五里無城郭出則乘象車亦有小駝地出犀象

銅石紫草蘇木諸藥四時炎熱無雪霜未嘗至中國咸

平四年來貢按其方

位四至亦東印度地

明史或言柯枝即古盤盤國宋梁隋唐皆入貢

唐書盤

海西北距環王限少海與狼牙修接自交州海行四十

日乃至宋元嘉梁大通中均入貢其民瀕水居比木為

欄石為矢鏃貞觀中王遣使朝其東南有哥羅富沙羅

王州二十四其兵有弓矢稍受以孔雀羽飾畫每戰以

百象為一隊一象百人鞍若檻囚人執弓稍在中賦率

輸銀三銖無絲絀惟吉貝非有官不束髮凡嫁娶納摺

椰爲禮多至二百盤東南有拘婁密海行一月至南婆利行十日不述行五日至西北距文單行六日至與赤土墮和羅同俗自小葛蘭西北行順風一日夜可至永樂

元年遣中官尹慶齋詔撫諭其國賜以銷金帳幔織金文綺綵幣及華蓋永樂六年復命鄭和使其國六年遣使來貢十年封其國中之山勒石山上宣德八年遣使偕錫蘭山諸國來貢正統元年遣其使者附瓜哇貢船還國賜勅勞王其國與錫蘭山對峙中通古里國界東太山西南北皆大海氣候常熱田瘠少收俗頗瀟築室用椰子樹卽取其葉爲苫覆王瑣里人尊釋教佛座四

旁皆水溝，復穿一井，每旦鳴鐘鼓，汲水灌佛，再三始羅拜而退。人分五等：第一南昆王族類，二回回，三哲地，皆富民，四革全，皆牙儂，最賤者曰木瓜，屋高不得過三尺，蓋極貧民。執賤役者，歲中二三月時有少雨，國人皆治舍儲食物以俟。五六月間大雨不止，街市成河，七月始晴，八月後不復雨，歲歲皆然。地產諸穀，獨無麥，諸畜亦皆有，惟無驚與驢。澳門紀畧：柯枝國分上三等，曰南昆王族類，曰回回，曰哲地，下二等，曰革全，皆牙儂，曰木瓜，最貧賤。遇南昆哲地人輒伏地。

明史又曰：小葛蘭其國與柯枝接境，自錫蘭山西北行

六晝夜可達東大山西大海南北地窄西洋小國也永  
樂五年遣使附古里蘇門答刺入貢賜其王錦綺紗羅  
鞍馬諸物其使者亦有賜王及郡下皆瑣里人奉釋教  
敬牛及他婚喪諸禮多與錫蘭同俗濱土薄收穫少仰  
給榜葛刺鄭和常使其國厥貢止珍珠傘白綿布胡椒  
又有大葛蘭波濤湍悍舟不可泊故商人罕至土黑墳  
本宜穀麥民懶事耕作歲賴烏爹之米以足食風俗土  
產多類小葛蘭柯枝即海錄之烏土國故大小葛蘭地  
接柯枝土亦黑墳無一不合考英夷所  
繪中國地圖亦列柯枝于大金沙江海口東岸  
與緬甸接以上二國皆東印度邊境故附著之

又曰古里西洋大國西濱大海南距柯枝國北距狼奴

爾國東七百里距坎巴國自柯枝舟行三日可至

觀柯枝至

古里必由舟行可見中隔江河蓋古里介大金沙及自

恒河二水之間而柯枝則在江河合流之東南岸也

錫蘭山十日可至諸番要會也永樂元年命中官尹慶

奉詔撫諭其國賚以綵幣其酋遣使從慶入朝貢三年

達南京封爲國王賜印誥及文綺諸物遂比年入貢鄭

和亦數使其國十三年偕柯枝南勃利甘巴里滿刺加

諸國入貢十四年又偕瓜哇滿刺加占城錫蘭山木骨

都束瀝山南淳利不刺哇阿丹蘇門答刺麻林刺撒忽



魯謨斯柯枝南巫里沙里灣泥彭亨諸國入貢是時諸番使臣充斥於廷以古里大國序其使者于首十七年偕滿刺加十七國來貢十九年又偕忽魯謨斯阿丹祖法兒刺撒不刺哇木骨都束柯枝加異勒溜山南淳利蘇門答刺阿魯滿刺加諸國遣使千一百人入貢時帝方出塞勅皇太子曰天時向寒貢使卽令禮官宴勞給賜遣還其以土物來市者官酬其直自成祖崩中朝不遣使諸國諸國貢使亦不來宣德五年復遣鄭和使其國八年其王遣使偕蘇門答刺柯枝錫蘭山祖法兒阿

丹甘巴里忽魯謨斯加異勒天方使臣入貢其使久留都下至正統元年乃命附瓜哇貢舟西還自是不復至其國山多地瘠有穀無麥俗甚淳行者讓道道不拾遺人分五等如柯枝王敬浮屠鑿井灌佛亦如之每旦王及臣民取牛糞調水塗壁及地又煨爲灰抹額及股謂爲敬佛國中半崇回回教建禮拜寺數十處七日一禮男女齋浴謝事午時拜天於寺未時乃散王老不傳子而傳甥無甥則傳弟無弟則傳於國之有德者國事皆決於二將領以回回人爲之刑無鞭笞輕者斷手足重

者罰金珠尤重者夷族沒產鞠獄不承則置其手指洗  
湯中三日不爛卽免罪免罪者將領導以鼓樂送還家  
親戚致賀富家多植椰子樹至數千其嫩者漿可飲亦  
可釀酒老者可作油糖亦可作飯幹可構屋葉可代瓦  
殼可製杯櫬可索綯煨爲灰可鑲金其他蔬果畜產多  
類中國所貢物有寶石珊瑚珠琉璃瓶琉璃枕寶鐵刀  
拂郎雙刃刀金繫腰阿思模達塗兒氣龍涎香蘇合油  
花氈單伯蘭布苾布之屬

又曰西洋瑣里洪武二年命使臣劉叔勉以卽位詔諭

其國三年平定沙漠復遣使臣頒詔其王遣使奉金葉表獻方物成祖頒卽位詔於海外諸國西洋瑣里亦與焉永樂元年二十一年偕古里阿丹等十五國來貢按源一統志云西洋瑣里本一小國乃占城暹羅錫蘭山柯枝諸大國王舊志皆云瑣里人故特存之此與古里皆東印度境於大地方位爲南洋非西洋也明史云概西洋者失之○明史西天阿難功德國西方番國也洪武七年遣其講主必尼西來朝貢方物及解毒藥石詔賜文綺禪衣及布帛諸物後不復至又有和林國師亦遣其講主來朝獻銅佛舍利曰哈丹布及元所授玉印玉圖書又曰尼入刺國在諸藏之西去中國絕遠其王皆僧爲之洪武十七年太祖已招徠諸番議通使其地命僧智光齋聖書綵幣待并使其鄰境地湧塔國智光精釋教員才嶺宣揚天子德意其王卽遣使隨入朝貢金塔佛經及名馬方物二十年達京師帝嘉賜銀印玉圖

書詔敕符驗及幡幢綵幣又賜其使者二十三年  
加賜王圖書紅羅緞終太祖時數歲一貢成祖嗣位後  
命智光使其國永樂七年遣使來貢十一年命楊三保  
齎璽書銀幣賜其嗣王及地湧塔王十六年命宦官鄭  
城齎書往所經罕東靈藏必力工瓦烏斯藏及野藍卜  
納皆有賜宣德二年又遣中官侯顯賜其王絨錦紗絲  
地湧塔王如之自後貢使不復至又有連親崇者亦西  
方之國永樂三年遣行人連迪等齎敕往招賜銀紗綵  
幣其酋以道遠竟不至萬厯野獲編曰西天功德阿難  
國古來不聞此夷名金元諸史及國朝會典皆不載必  
胡僧賺賞偽造美名以欺天朝耳源峯明史尙有加異  
勒國甘巴里國吉蘭丹國皆永樂宣德中鄭和所奉使  
招徠偕古里柯枝南淳利等國入貢其隣境  
尙有小阿蘭撥丹二國皆東印度之部落

南印度沿革

原無今補  
錫蘭山島

後漢書東離國居沙奇城在天竺東南三千餘里大國也其土氣物類與天竺同列城數十皆稱王大月氏伐之遂臣服焉男女皆長八尺而怯弱乘象駱駝往來鄰國有寇乘象以戰

新唐書瞻博或曰瞻婆北距琬伽河多野象羣行顯慶中與婆岸千支弗舍跋若磨臘四國並遣使入朝千支在西南海中本南天竺屬國亦曰半支跋若唐言五山也北距多摩婁又有哥羅舍分修羅分甘畢三國貢方

物甘畢在南海上東距環王有勝兵五千哥羅舍分者在南海南東婆和羅修羅分者在海北東距真臘其風俗大略相類有君長皆柵郭二國勝兵二萬甘畢才五千又有多摩菴東距婆鳳西多隆南干支弗北訶陵地東西一月行南北二十五日行俗無姓婚姻不別同姓王坐常東向勝兵二萬有弓刀甲稍無馬果有波那婆宅護遮菴摩石榴其國經薩盧都訶盧君那盧林邑諸國乃得交州顯慶中貢方物

案通典有章求拔國在東印度西未審爲南否也

南印度海中錫蘭山島國沿革

一曰師子國一曰僧伽刺國一曰楞

伽山一曰則意蘭島

梁書師子國天竺旁國也其地和適無冬夏之異五穀隨人所種不須節其國舊無人民止有鬼神及龍居之諸國商賈來共市易鬼神不見其形但出珍寶顯其所堪價商人依價取之諸國人聞其土樂因此競至或有停住者遂成大國晉義熙初始遣獻玉像經十載乃至像高四尺二寸五色潔潤形製殊特殆非人工此像歷晉宋世在瓦官寺寺先有徵士戴安道手製佛像五軀



及顧長康維摩畫圖世人謂爲三絕至齊東昏遂毀玉像前截臂次取身爲嬖妾潘貴妃作釵釧宋元嘉六年十二月其王刹利摩訶遣貢獻大通元年後王伽葉伽羅訶梨邪使奉表

新唐書師子國居西南海中延袤二十餘里有稜加山多奇寶以寶置洲上商舶償直輒取去後隣國人稍往居之能馴養師子因以名國總章三年遣使者來朝天寶初王尸羅迷迦再遣使獻大珠鈿金寶

明史錫蘭山卽古狼牙修梁時曾通中國自蘇門答刺

順風十二晝夜可達永樂中鄭和使西洋至其地其王欲害和和覺去之他國其王又不睦鄰境屢邀劫往來使臣諸番皆苦之及和歸復經其地乃誘和至國中發兵五萬劫和舟且塞歸路和乃率部卒二千由間道乘虛攻拔其城生擒其王妻子頭目獻俘于朝廷諸臣請戮帝釋之擇其族之賢者立之其舊王亦釋歸自是海外諸番益服天子威德貢使載道而其王遂屢入貢其國地廣人稠貨物多聚亞于瓜哇東南海中有山三四座總名曰翠藍嶼大小七門門皆可通舟中一山尤高

大番名梭篤蠻山其人皆巢居穴處赤身髡髮自此山  
西行七日見鸚哥嘴山又二三日抵佛堂山卽入錫蘭  
國境海邊山石上有一足跡長三尺許故老云佛從翠  
蘭嶼來踐此故足跡尙存中有淺水四時不乾人皆手  
蘸以洗面目山下僧寺有釋迦真身側卧床上旁有佛  
牙及舍利相傳佛涅槃處也其寢座莊嚴甚麗王所居  
側有大山高出雲漢產諸色寶石每大雨衝流山下海  
旁有浮沙珠蚌聚其內故其國諸珠寶特富王所居國  
人崇釋教重牛日取牛糞燒灰塗其體又調之以水徧

塗地上乃禮佛手足直舒腹貼于地以爲敬不食牛肉  
止食其乳死則瘞之有殺牛者罪至死氣候常熱米粟  
豐足雖富饒然不喜噉飯欲噉則於暗室不令人見男  
子裸上體下圍以布徧體皆毫毛悉薙去惟髮不薙所  
貢物有珠珊瑚寶石水晶撒哈喇西洋布乳香木香樹  
香檀香沒藥硫磺簾謁蘆薈烏木胡椒磁石馴象之屬  
案梁書狼牙修國與師子國分敘爲二國狼牙敘  
于干陀利之後婆利之前而師子國則敘于婆利  
及天竺之後東西判然迥不相侔安得以狼牙修  
爲錫蘭山而置龍鬼合居之師子國于不問乎明  
史之外國沿革無  
一不繆有如此者

廣東通志錫蘭山疆域在西洋與柯枝國對峙南以別  
羅里爲界自羅里南去順風七晝夜可至滿山洋國十  
晝夜可至古里國二十一晝夜可至小刺哇國柯枝接  
大小葛蘭二國山連赤土上自小葛蘭順風二十晝夜  
可至木骨都東國自古里順風二十晝夜可至忽魯謨斯  
國二十晝夜可至刺撒國二十二晝夜可至阿丹國又  
自忽魯謨斯四十晝夜可至天方國乃南洋之盡處也  
書稱狼牙修國在南海中其界東西三十日行南北二  
十日行北去廣州二萬四千里蓋卽此國  
西域記附注僧伽羅國古之師子國又曰無憂國卽南  
印度其地多奇寶又名日寶諸昔釋迦牟尼佛化身名  
僧迦羅國人推尊爲王以大神通力破大鐵城滅羅刹  
女挫怖危難于是建都築邑化導四方示寂留牙在于  
茲土國有凶荒災異無所隨應今之錫蘭山卽古之僧  
伽羅國也王宮側有佛牙精舍節以眾寶輝光赫灼累  
世相承敬禮不衰今國王阿烈苦奈兒瑣里人也崇祀  
外道不敬佛法暴虐國人永樂三年太監鄭和奉香花

往詣彼國供養王欲加害鄭和知其謀遂去後復遣鄭和往賜諸番并賜錫蘭山國王王益慢不恭欲圖害使者用兵五萬人刊木塞道分兵以劫海舟會其下預泄其機鄭和等歸路已絕潛遣人回舟備水師拒之而和自以兵三千夜由間道攻入王城守之其劫海舟番兵乃與其國內番兵四面攻圍數重拒戰六日和等執其王凌晨開門伐木取道且戰且行凡二十餘里抵葛始達舟卽禮請佛牙登舟靈異非常光彩照輝歷涉巨海數萬里風濤不驚如履平地永樂九年七月至京師詔於皇城內莊嚴旃檀金剛寶座貯修供養佛牙精舍側有小精舍亦以眾寶而爲瑩飾中有金佛像此國先王等身而鑄肉髻則貴寶飾焉至是并歸中國元王大淵島夷志畧僧加刺疊山環翠洋海橫峙其山腰有佛殿巋然則釋迦佛舍利所在海濱有石如蓮臺上有佛足跡長二尺有四寸闊七寸深五寸許跡中海水入其內不鹹而甘病者飲之則愈土人面紫身黑眼巨而長手足溫潤而壯健壽多至百餘歲佛初憐彼方之人貧而爲盜故以善化其民後以甘露水灑池俾產

紅石土人掘之得此以濟貿易皆令溫飽而善其佛  
前有一鉢盂非玉非銅非鐵色紫而潤敲之有玻璃聲  
故國初凡三遣使取之云

南懷仁坤輿圖說印第亞之南有則意南島離赤道北  
四度人自幼以環繫耳漸垂至肩而止海中多珍珠江  
河生貓睛昔泥紐金剛石等山林多桂皮香木亦產水  
晶嘗琢成棺殮死者相傳爲中國人所居今房屋殿宇  
亦頗相類西有小島數十總名馬兒地襍悉爲  
人所居海中生一椰樹其實甚小可療諸病

按南印度之楞伽島舊爲羅刹所居人不敢至佛爲  
說法尙不能戒殺見於法苑珠林所載梁書亦言其  
爲龍與鬼神所居何以後世竟爲耕桑商舶之地惟  
西域記附注言僧伽刺王仗佛力以滅羅刹之事得

其實矣。凡佛經所言轉輪聖王及阿修羅皆劫初時地天之通未絕。非後世所有。故昔日羅刹夜叉各島今皆開闢。生齒繁殖。而西牛貨州東神勝洲今亦商舶通行。氣運日開。不怪爲怪。固難以爲夏蟲井蛙道也。

又案瀛環志略言中有高山。土產鴉鵲寶石。每遇大雨衝流山下。從沙中拾取之。隋常駿至林邑極西。望見之。番人謂高山爲錫南。因名云。

附補落伽山及潘山

補落伽山一名普陀山



大唐西域記南印度瀕海有株刺耶山產龍腦香山東  
有布吐落迦山頂有池池側有石天宮觀自在菩薩往  
來遊舍從此山東北海畔有城是往南海僧迦羅國路  
從此入海東南可三千餘里至僧迦羅國唐書師子國  
亦南印度之境也國周七千餘里昔本寶渚羅刹居之  
前王僧伽刺治兵浮海而往誦咒奮武遂有其國其王  
卽釋迦佛之前生也。案補落迦山在南印度瀕海  
之岸非島也由此生也。乃至錫南山島故別載之  
海島逸志曰穆迦濱於南海真佛所居山極高峻徧地  
黃金美玉百神守護不得取也真修者必登穆迦禮拜  
真佛持齋受戒數年而出人皆稱曰老君自能降神伏  
怪驅邪斬鬼手持念珠慈悲可掬見者知其有道。案  
此卽南印度瀕海之  
落迦山也非錫蘭島  
明史瀕山自錫蘭山別羅里南去順風七晝夜可至自  
蘇門答刺過小幡山西南行十晝夜可至永樂十年鄭  
和往賜其國自後三貢並與忽魯謨斯諸國偕宣德五  
年鄭和復使其國後竟不至其山居海中有三石門竝

可通舟無城郭倚山聚居氣候常熱土薄穀少人皆捕魚暴乾以充食王及羣下盡回回人婚喪諸禮多類忽魯謨斯山下有八港各以潮名或言外更有三千漚舟或失風入其處卽有沉溺之患

魏源曰五印度之地惟南印度斗出大海形如箕舌似中國之登萊而補落迦山則猶登州之成山其錫蘭島之楞伽山則四面皆海猶瓊州臺灣也普陀之在西藏在浙江定海者皆後出傳會惟此近翔實以非西夷市舶所集故無述焉獨是錫蘭島逼近印度史稱地廣富庶亞於爪哇南懷仁艾儒略均圖述之何以亦闕然於英夷據印度之後惟地里備考以榜甲刺等十九部爲

印度公司兼轄之地以錫蘭島爲土君專轄之地其言較核於諸夷書蓋南洋斗出瀕海之岸爲大西洋各國市埠環峙有英吉利埠有荷蘭埠有佛蘭西埠有彌利堅埠有葡萄牙埠岸市盛故島市微矣濶山諸島林立環錫蘭山而地里備考謂錫蘭山四面千嶼環之其人物生殖者惟四五十島亦最切南洋之形勢譚印度者可無唐棗空之憾焉

案海間小島名目實繁西人以意命名不能盡一大約大則百里小則數十里洲嶼星列耳

西印度沿革

唐以前安息條支皆佛教傳入也唐以後大食波斯始皆回教故以宗

佛教者  
歸此類

漢書安息國治番兜城去長安萬一千六百里不屬都護北與康居東與烏弋山離西與條支接土地風氣物類所有民俗與烏弋屬賓同亦以銀爲錢文獨爲王面幕爲夫人面王死輒更鑄錢有大馬爵其屬小大數百城地方數千里最大國也臨娑水商賈車船行旁國書革旁行爲書記武帝始遣使至安息王令將將二萬騎迎於東界東界去王都數千里行比至過數十城人民

相屬因發使隨漢使者來觀漢地以大鳥卵及犁耜眩人獻於漢天子大說安息東則大月氏

漢書又曰烏弋山離國行可百餘日乃至條支國臨西

海

案此西海謂地中海魏書謂此西渤海也

暑溼田稻有大鳥卵如燕人眾

甚多往往有小君長安息役屬之以爲外國善眩安息長者傳聞條支有弱水西王母亦未嘗見也自條支乘

水西行可百餘日近日所入云

此語魏書已破其妄見大西洋沿革云

後漢書安息國居和橫城去洛陽二萬五千里北與康居接南與烏弋山離接地方數千里小城數百戶口勝

兵最爲殷盛其東界木鹿城號爲小安息去洛陽二萬里章帝章和元年遣使獻獅子符拔符拔形似麟而無角和帝永元九年都護班超遣甘英使大秦抵條支臨大海欲度而安息西界船人謂英曰海水廣大往來者逢善風三月乃得度若過遲風亦有二歲者故入海人皆齋三歲糧海中善使人思土戀慕數有死亡者英聞之乃止

案大秦與條支止隔地中海海長雖萬餘里僅廣二三千里順風對度數日可至安有此阻難之理此西夷貪漢使財物恐其西通大秦自相貿易則已國不得並斷其利故爲此恐嚇之誕詞也至魏書始破其

十三年安息王滿屈復獻獅子及條支大鳥時謂

之安息雀自安息西行三千四百里至阿蠻國從阿蠻  
西行三千六百里至斯賓國從斯賓南行度河又西南  
至于羅國九百六十里安息西界極矣自此南乘海乃  
通大秦其土多海西珍奇異物焉

後漢書自皮山西南經烏秣涉懸度厯罽賓六十餘日  
行至烏弋山離國地方數千里時改名排持復西南馬  
行百餘日至條支條支國城在山上周回四十餘里臨  
西海海水曲環其南及東北三面路絕唯西北隅通陸  
道土地暑溼出師子犀牛封牛孔雀大雀大雀其卵如

發轉北而東復馬行六十餘日至安息後役屬條支  
置大將監領諸小城焉

魏書安息在蔥嶺西都蔚搜城北與康居西與波斯相  
接在大月氏西

隋書安國漢書安息國也王姓昭武與康國王同族都  
那密山南城有五重環以流水宮殿皆爲平頭煬帝初  
遣杜行滿至其國又烏那曷國都烏澹水西舊安息之  
地王姓昭武康國種類東北去安國四百里西北去穆  
國二百餘里東去瓜州七千五百里穆國都烏澹河西



亦安息故地與烏那曷爲鄰其王姓昭武亦康國種類  
東北去安國五百里東去烏那曷二百餘里西去波斯  
國四千餘里東去瓜州七千七百里唐書以後安息改  
波斯皆回教非佛教矣別  
見巴杜阿丹兩國沿革

魏書波斯國都宿利城在忸密西古條支國也城方十  
里河經其城中南流出金銀鐵石珊瑚琥珀車渠瑪瑙  
多大真珠頗梨瑠璃水晶琴瑟金剛火齊鑽鐵銅錫硃  
砂水銀等物氣候暑熱家自藏冰有鳥形如鸞鷟有兩  
翼飛不能高食草與肉亦能噉火神龜中遣使入貢

隋書波斯國都達曷水之蘇蘭城卽條支故地西去海數百里東去穆國四千餘里西北去拂菻四千五百里東去瓜州萬一千七百里都城方十餘里勝兵二萬餘乘象而戰妻其姊妹國無死刑或繫排于頸以標之煬帝遣李昱使波斯尋遣使貢方物

宋史注輦國東距海五千里西至西天竺千五百里

宋史

原本作距海五里又天竺上無西字此據文獻通考南至羅蘭二千五百里北至

頓田三千里自古不通中國水行至廣州約四十一萬一千四百里其國有城七重高七尺南北十二里東西

七里每城相去百步凡四城用磚二城用土最中城以木爲之皆植花果雜木其第一至第三皆民居環以小河第四城四侍郎居之第五城主之四子居之第六城爲佛寺百僧居之第七城卽主之所居室四百餘區所統有三十一部落其西十二其南八其北十二今國主相傳三世矣民有罪卽命侍郎一員處治之輕者繫於木格笞五十至一百重者卽斬或以象踐殺之其宴則國主與四侍郎膜拜于階遂共座作樂歌舞不飲酒而食肉案回教食牛羊肉不飲酒俗衣布亦有餅餌掌饌執事用婦人

其嫁娶光用金銀指環越諾布及女所服錦衣遺婿若  
男欲離女則不取聘財女卻男則倍償之其兵陣用象  
居前小牌次之梭槍次之長刀又次之弓矢在後四侍  
郎分領其眾國東南約二千五百里有悉蘭池國或相  
侵伐地產眞珠象牙珊瑚頗黎檳榔豆蔻吉貝布獸有  
山羊黃牛禽有山雞鸚鵡果有餘甘藤羅千年棗椰子  
甘羅崑崙梅婆羅密等花有白末利散絲蛇膽佛桑麗  
秋青黃碧婆羅瑤蓮蟬紫水蕉之類五穀有綠豆黑豆  
麥稻地宜竹自昔未嘗朝貢大中祥符八年來貢以盤

本珍珠碧玻璃升殿布於御坐前降殿再拜離本國舟  
行七十七晝夜歷那勿丹山娑里西蘭山至占賓國又  
行六十一晝夜歷伊麻羅里山至古羅國國有古羅山  
因名焉又行七十一晝夜歷加八山占不牢山舟寶龍  
山至三佛齊國又行十八晝夜度巒山水口歷天竺山  
至賓頭狼山望東西王母塚距舟所將百里又行二十  
晝夜度羊山九星山至廣州之琵琶洲離本國凡千一  
百五十口至廣州焉凡宴賜恩例同龜茲使明道二年  
表進珍珠衫帽及真珠一百五兩象牙百株自言數朝

貢而海風破船不達願將上等珠就龍牀腳撒殿頂戴  
瞻禮以申嚮慕之心乃奉銀盤升殿跪撒珠于御榻下  
而退

宋史云屑壇國在南海傍城距海二十里熙寧四年始  
入貢海道使風行百六十日經勿巡古林三佛齊國乃  
至廣州傳國五百年十世矣人語言如大食地春冬暖

貴人以越布纏頭

案此卽白帽回亦曰纏頭回

服花錦白毳布出入

乘象馬有奉祿其法輕罪杖重罪死穀有稻粟麥食有  
魚畜有綿羊山羊沙牛水牛橐駝馬犀象藥有木香血

竭沒藥鵬砂阿魏薰陸產珍珠玻璃密華三酒交易用  
錢官自鑄三分其齊金銅相半而銀居一分禁民私鑄  
元豐六年使再至神宗念其絕遠詔頒資如故事仍加  
賜白金二千兩

坤輿圖說阿爾母斯其地悉是鹽及硫磺草木不生鳥  
獸絕跡人著皮履遇雨過履底一日輒敗多地震氣候  
極熱須坐卧水中沒至口方解絕無淡水勺水皆從海  
外載至因居三大洲之中富商大賈多聚此地百貨駢  
集人煙輻輳凡海內珍奇難致之物輒往取之

源案明史作忽

曾謨斯文南懷仁圖中有阿爾岡河聯方外紀則作阿爾謨海與西紅海相對共兩海汶而阿丹回國則夾于二海汶之間蓋歐羅巴洲之貨由地中海來者皆在此過載駁陸再下南洋海而亞細亞洲南洋之貨亦至此入內河分赴彼二州也

明史祖法爾國自古里西北放舟順風十晝夜可至永樂十九年遣使偕阿丹刺撒諸國入貢命鄭和齎聖書賜物報之宣德正統屢貢其國東南大海西北重山天時常若八九月五穀蔬果諸畜咸備人體頗碩王及臣民悉奉回回教婚喪亦遵其制多建禮拜寺過禮拜日市絕貿易男女長幼皆沐浴更新衣以薔薇露或沉香



油拭面焚沉檀俺八兒諸香于鑪人立其上以薰衣然後往拜所過街市香經時不散天使至詔書開讀訖其王遍諭國人盡出乳香血竭蘆薈沒藥蘇合油安息香諸物與華人交易乳香乃樹脂其樹似榆而葉尖長土人斫樹取其脂爲香有駝雞頸長類鶴足高三四尺毛色若駝行亦如之常以充貢

案地產駝雞知爲安息大食境故入之西印度

又曰忽魯謨斯西洋大國也自古里西北行二十五日可至永樂十年天子以西洋近國已航海貢琛稽顙闕下而遠者猶未賓服乃命鄭和齎璽書往撫忽魯謨斯

比刺溜山孫刺諸國賜其王錦綺綵帛紗羅妃及大臣  
皆有賜至忽魯謨斯王卽遣陪臣奉金葉表貢馬及方  
物十一年至京師命禮官宴賜酬以馬直比還賜王及  
妃以下有差自是凡四貢和亦再使後朝使不去其使  
者亦久不至宣德五年復遣和宣詔其國乃遣使來貢  
八年至京師宴賜有加正統元年附爪哇舟還國嗣後  
遂絕其國居西海之極自東南諸蠻邦及大西洋商舶  
西域賈人皆來此貿易故寶貨填溢氣候有寒暑春發  
葩秋隕葉有霜無雪多露少雨土瘠穀麥寡然他方轉

輸多價極賤民富俗厚或遭禍致貧眾皆遺以錢帛共  
振業之王及臣下俱回回人婚喪悉用其禮人多白晳  
豐偉婦女出則以紗蔽面市列厯肆百物具備惟禁治  
犯者罪至死醫卜技藝皆類中華交易用銀錢書用回  
回字王遵其教日齋戒沐浴虔拜者五地多鹹不產草  
木牛羊馬駝皆噉魚脂壘石爲屋有三四層者寢處庖  
厠及待客之所皆在其上饒蔬果有核桃把冊松子石  
榴葡萄花紅萬年棗之屬有大山四面異色一紅鹽石  
鑿以爲器盛食物不加鹽而味自和一白土可塗垣壁

一赤土一黃土皆適於用所貢有獅子麒麟駝雞

靈羊常貢則大珠寶石之類

源案西印度諸國皆安息大食之地故皆產駝雞

漢書所謂安息大鳥今閩粵甯波上海洋船多載還內地其雞高三四尺花冠翠羽其行若駝俗云洋雞者也但此尚非至大者其本國駝禽高大更倍天方典禮云駝雞尾長似雉雌者高三尺至七八尺雄者高丈餘背有肉鞍似駝可乘致遠跡蒼色張翅甚大其卵如雞可作器舟船難載故罕至云此皆西南洋非大小西洋而明史謂其國居西洋之極者鄭和之舟至此而返也

北印度沿革

原無今補輯。今克什彌爾古屬賓國，即北印度也。與西印度皆不屬英

火。其西境之愛烏罕，即古大月氏，亦與北印度犬牙相錯。

又案北印度與鄰境各國有大雪山界之，雪山之北則印度河界之，其南與中印度亦有大山爲界。疆域本不難辨，後人不審西域記，自作紛擾耳。

漢書西域記罽賓國王治循鮮城，去長安萬二千二百

里，不屬都護，戶口勝兵多大國也。東北至都護治所六千八百四十里，東至烏秣國二千二百五十里，東北至難兜國九日行，西北與大月氏西南與烏弋山離接，昔匈奴破大月氏，大月氏西君大夏，而塞王南君罽賓，塞

種分散往往爲數國自疏勒以西北休循捐毒之屬皆  
故塞種也屬賓地平溫和有苜蓿雜草奇木檀欒梓竹  
漆種五穀葡萄諸果糞治園田地下溼生稻冬食生菜  
其民巧雕文刻鏤治宮室織罽刺文繡好治食治金銀  
銅錫以爲器市列以金銀爲錢文爲騎馬幕爲人面出  
封牛水牛象大狗沐猴孔雀珠璣珊瑚琥珀壁流離它  
畜與諸國同自武帝始通屬賓自以絕遠漢兵不能至  
其王烏頭勞數剽殺漢使後軍侯趙德使屬賓與其王  
陰末赴相失陰末赴鎖狼當德殺副以下七十餘人遣

使者上書謝孝元帝以絕域不錄放其使者於縣度絕而不通成帝時復遣使獻謝罪漢欲遣使者報送其使杜欽說大將軍王鳳曰屬賓前親逆節惡暴西域故絕而不通今悔過來而無親屬貴人奉獻者皆行賈賤人欲通貨市買以獻爲名又煩使者送至縣度爲防護寇害起皮山南更不屬漢之國四五斥候士百餘人五分夜擊刁斗自守尙時爲所侵盜驢畜負糧須諸國稟食得以自贍國或貧小不能食或桀黠不肯給擁疆漠之節餒山谷之間人畜棄捐曠野而不反又歷大頭痛小

頭痛之山赤土身熱之阪令人身熱無色頭痛嘔吐驢  
畜盡然又有三池盤石阪道陜者尺六七寸長者徑三  
十里臨崢嶸不測之深行者騎步相持繩索相引二千  
餘里乃到縣度畜墜未半阬谷盡靡碎人墮執不得相  
收視險阻危害不可勝言聖王分九州制五服務盛內  
不求外今遣使者承至尊之命送蠻夷之賈勞吏士之  
衆涉危難之路非計也使若業已受節可至皮山而還  
於是鳳白從欽言屬賓實利賞賜賈市其使數年而一  
至

案縣度在烏程西與屬賓鄰當在今巴達克山西境乃印度河岸也



後漢書大月氏國居藍氏城西接安息四十九里東去長史所居六千五百三十七里去洛陽萬六千三百七十里戶十萬口四十萬勝兵十餘萬人初月氏爲匈奴所滅遂遷於大夏分其國爲休密雙靡貴霜胖頓都密凡五部翎侯後百餘歲貴霜翎侯邱就卻攻滅四翎侯自立爲王國號貴霜王侵安息取高附地又滅濮達罽賓悉有其國至其子立復滅天竺置監領月氏自此之後最爲富盛諸國稱之皆曰貴霜王漢本其故號言大月氏云高附國在大月氏西南亦大國也其俗似天

竺而弱易服，善賈販，內富於財，所屬無常。天竺罽賓安息二國，強則得之，弱則失之，而未嘗屬月氏。漢書以爲五翎侯數非其實也。後屬安息，及月氏破安息，始得高附。

魏書大月氏國都盧監氏城，在佛敵沙西，去代一萬四千五百里。北與蠕蠕接，數爲所侵，遂西徙都薄羅城，去弗敵沙二千一百里。其王寄多羅勇武，遂興師越大山，南侵北天竺，自乾陀羅以北五國盡役屬之。世祖時，其國人商販京師，自云能鑄石爲五色瑠璃，於是採礦山。

中於京師鑄之既成光澤乃美於西方來者乃詔爲行  
殿容百餘人光色映徹觀者見之莫不驚駭以爲神明  
所作自此中國璫璃遂賤人不復珍之○阿鈎羌國在  
莎車西南去代一萬三千里國西有縣度山其間四百  
里中往往有棧道下臨不測之淵人行以繩索相持而  
度因以名之士有五穀諸果市用錢爲貨居止立宮室  
有兵器土出金珠一統志漢書稱烏秬國西有縣度魏書則以權于靡國卽漢之烏秬而縣  
度在阿鈎羌國之西考阿鈎羌去權于靡止三十里境  
壤毘連蓋漢烏秬國至魏分而爲二其在今則皆拔達  
克山境也又波路國在其西北與今布魯特在拔達克  
山西北者地勢正合波路與布魯音近其爲布魯特部

無。○小月氏國都富樓沙城其王本大月氏王寄多羅子也寄多羅爲匈奴所逐西徙後令其子守此城因號小月氏焉在波路西南去代一萬六千六百里先居西平張掖之間被服頗與羌同其俗以金銀錢爲貨隨畜牧移徙亦類匈奴其城東十里有佛塔周三百五十步高八十丈自佛塔初建計至武定八年八百四十二年所謂百丈佛圖也○罽賓國都善見城在波路西南去代一萬四千二百里居在四山中其地東西八百里南北三百里地平溫和有苜蓿雜草奇木檀槐紫竹種五

穀糞園出地下淫生稻冬食生菜其人工巧屬文刻鏤  
織罽有金銀銅錫以爲器物市用錢他畜與諸國同每  
使朝獻○噉達國大月氏之種類也亦曰高車之別種  
其原出於塞北自金山而南在于闐之西都馬許水南  
二百餘里去長安一萬一百里其王都拔底延城蓋王  
舍城也其城方十里餘多寺塔皆飾以金風俗與突厥  
畧同其語與柔然高車及諸胡不同眾可十萬無城邑  
依隨水草能鬥戰西域康居于闐沙勒安息及諸小國  
三十許皆役屬之號爲大國與柔然婚姻自太安以後

每遣使朝貞初熙平中肅宗遣王伏子統宋雲沙門法  
力等使西域訪求佛經時有沙門慧生者亦與俱行正  
光中還慧生所經諸國不得知其本末及山川里數蓋  
舉其畧云其國去潛國千五里去瓜六千五百里一統志今  
愛烏罕爲蔥嶺西南大國漢書所云南道踰蔥嶺則出  
大月氏與今愛烏罕適合魏嘽噠隋挹怛皆月氏總類  
其所載都馬許水南及烏許水南蓋字畫之傳訛漢書  
稱其都媽水烏許與媽其音固朴近是嘽噠挹怛之與  
月氏同爲一地○鉢和國在渴盤陁西其土尤寒人畜  
皆愛烏罕境也○同居穴地而處又有大雪山望若銀峯有二道一道西  
行向嘽噠一道西南趣烏菴亦爲嘽噠所統○賧彌國

在波知之南山居不信佛法專事諸神亦附嘍囉東有鉢盧勒國路險緣鐵鎖而度下不見底熙平中宋雲等竟不能達。烏菟國在賒彌南北有蔥嶺南至天竺婆羅門胡爲其上族婆羅門多解天文吉凶之數其王動則訪決焉土多林果引水灌田豐稻麥事佛多諸寺塔事極華麗爲法不殺犯死罪唯徙于壘山西南有檀持山山上立寺以驢數頭運食山下無人控御自知往來也。乾陀國在烏菟西本名業波爲嘍囉所破因改焉其王本是勅勒臨國民二世矣好征戰與罽賓國鬪三

年不罷人怨苦之有鬥象七百頭十人乘一象皆執兵仗象鼻縛刀以戰所都城東南七里有佛塔高七十丈周三百步卽所謂雀離佛圖

新唐書吐火羅或曰土豁羅曰覩貨羅元魏謂吐呼羅者居蔥嶺西烏滸河之南古大夏地與挹怛雜處勝兵十萬國土著少女多男北有頗黎山其陽穴中有神馬國人游牧牝于側生駒軋汗血其王號葉護武德貞觀時再入獻永徽元年獻大鳥高七尺色黑足類橐駝翅而行日三百里能噉鐵俗謂駝鳥顯慶中以其阿緩城



爲月氏都督府，析小城爲二十四州。挹怛國，漢大月氏之種。大月氏爲烏孫所奪，西過大宛，擊大夏，臣之。治藍氏城，大夏卽吐火羅也。嚧噠王，姓也。後裔以姓爲國，訛爲挹怛，俗類突厥。天寶中，遣使朝貢，俱蘭或曰俱羅弩曰屈浪弩，與吐火羅接壤，地三千里。南大雪山，北俱魯河，出金精、琢石，取之。貞觀二十年，遣使者來獻，書辭類浮屠語。劫國居蔥嶺中，西南距賒彌，西北挹怛也。去京師萬二千里，氣常熱，有稻、麥、粟、豆，畜羊、馬。武德二年，遣使者獻寶帶、玻璃、水精、柁，越底延國南三千里，距天竺。

西北千里至賒彌東北五千里至瓜州居辛頭水之北其法不殺人重罪流輕罪放無租稅俗剪髮被錦袍貧者白氍毹自澡潔氣溫多稻米石甯

此國非北印度而與北印度毘連故先述之

新唐書箇失密或曰迦涇彌羅北距勃律五百里環地四千里山回繚之他俗無能攻伐王城西瀕彌那悉多大河地宜稼多雪不風出火珠鬱金龍種馬俗毛褐世傳地本龍池龍徙水竭故往居之開元初遣使者朝獻胡藥且言有國以來並臣天可汗受調發國有象馬步

三種兵、臣身與中天竺王阇吐蕃、五大道禁出入、戰輒勝、有如天可汗兵至勃律者、雖眾二十萬、能輸糧以助、又國有摩訶波多磨龍池、願爲天可汗營祠、因丐王冊、冊木多筆爲王、自是職貢有常、其役屬五種、亦名國、所謂咀叉始羅者、地二千里、有都城、東南餘七百里、得僧訶補羅地三千餘里、亦治都城、東南山行五百里、得烏刺尸地二千里、有都城、宜稼穡、東南限山千里、卽倚失密、西南行險七百里、得半斂蹉地二千里、又得曷邏闐補羅者、其大四千里、有都城、多山阜、人驍勇、五種皆無

君長云

新唐書罽賓，隋漕國也。居蔥嶺南，距京師萬二千里。而  
罽南距舍衛三千里。王居修鮮城，常役屬大月氏。地暑  
溼，人乘象，俗治浮屠法。武德二年，遣使貢寶帶、金鎖、水  
精、瑤頗黎。貞觀中，獻名馬。遣果毅何處羅拔等厚齎賜  
其國，并撫尉天竺。處羅拔至罽賓，王東向稽首再拜，仍  
遣人導護使者至天竺。顯慶三年，以其地修鮮爲都督  
府。開元七年，遣使獻天文祕方奇藥。罽賓及烏菴國王  
乾元初，使者朝貢。

海國圖志卷三十一

西南洋

沿革

邵陽

北印度西北鄰部附錄

漢書罽賓以西北印度之鄰境也隋唐為

九姓昭武等國見大唐西域記者孰北印度孰非北印度至為昭析今不復錄惟元代盡易國名而明史誤以北方之賽馬爾罕為罽賓官書西域圖志又以南方之溫都斯坦為罽賓罽賓以南之西藏方為天竺遂燕郢易位芬如亂絲今特畫出北印度以外各國以區戎索特自元明始

邱長春西遊記

門人李志常述前牛烏程程同文注後半大興徐松注魏源附注

真人

長春子姓邱名處機登州棲霞人己卯年住萊州吳天

觀己卯元太祖稱帝十四年宋寧宗嘉定十二年金宣宗興定三年江南河南各大帥

屢邀請不往。會是冬十二月，成吉思皇帝遣侍臣劉仲

祿以虎頭金牌率二十騎來請。時山東尙爲金有，迺兩

朝講好，故使命得通。庚辰年正月，啟行。庚辰，元太祖十五年。宋寧宗嘉

定十三年。金宣宗興定四年。由燕京出居庸關，駐宣德州。十月，斡辰

大王遣使臣阿里鮮來請。程同文曰：斡辰，大王卽太祖第四弟斡赤斤也。太祖西征，

命斡赤斤居守斡難河。以辛巳年二月八日啟行。辛巳，元太祖十六年。宋寧宗嘉

定十四年。金宣宗興定五年。度野狐嶺。在張家口外。北過撫州，十五日東

北，過蓋里泊，有鹽池。金史撫州之豐利縣有蓋里泊，在今張家口北百里。迤東北

去，自此無河，鑿沙井以汲。南北數千里，亦無大山，馬行

三日出明昌界、又六七日忽入大沙陀、即大漠東北行千

里外、三月朔出沙陀、至漁兒濼、始有人煙聚落、張德輝紀行云

昌州以北入沙陀、凡六驛而出沙陀、與此正同、今爲達兒海子在克什克騰部落北又二十餘日

方見一沙河西北流入陸局河、陸局河即臚胸河也、音轄、今克魯倫河也渡

河北行、三日入小沙陀、四月朔至幹辰大王帳下、即幹

舊帳、非十七日馬首西北、二十二日抵陸局河、積水成

海、周數百里、並河南岸西行、五月朔亭午、日有食之、水

流東北行十有六日、河勢遶西北山去、不得窮其源、克

倫河發源肯特嶺南、流及平地始轉東南、西南濼驛路長春由河南岸折河西行、故不見來源

西南濼驛路

又行十日、夏至量日影三尺六七寸、漸見大山峭拔、從

此以西、漸有山阜、

此所見大山、當卽肯特嶺

又四程西北渡河、乃平

野

此所渡土、騰河也

山川秀水草饒、有契丹故城、蓋遼亡士馬

不降者、西行所建城邑也、又言西南至尋思干城萬里

外、回紇最佳處、契丹都焉、歷七帝、

註詳下、次蓋契丹初、奔乃蠻後、乃西徙回

紇葱嶺也、故乃蠻之

亡來投西契丹歟六月十三日至長松嶺後宿、十四

日過山度淺河、天極寒、十七日宿嶺西、盛夏冰雪、山路

盤曲、西北且百餘里、旣而復西北、始見平地、有石河長

五十餘里、

此鄂爾昆河、東流將曾喀拉河、處河經山峽、故曰石河、雍正中、拒準噶爾、其時黑龍江兵



至鄂羅坤河軍營者過汗山即西北渡土拉河又西北行踰喀里雅爾山乃濟鄂爾坤河與長春行程正同長松嶺富即喀里雅爾山其地已在北極出地四十九度是以寒甚歟山行五六日峯回路

轉尋登高嶺勢若長虹壁立千仞俯視海子淵深惡人

此厄魯赫特山也二十八日泊窩里朶之東窩里朶漢語行宮

也奉皇后旨請師渡河其水東北流瀰漫沒軸入營駐

車南岸其車輿亭帳望之儼然古之大單于未有若此

之盛也此和林行宮也在鄂爾坤河之北色楞格河之

即元時和林河也以水得名其地爲自昔回紇建牙之所其所渡之河或即入和林河之支流今日瑚伊努河

七月九日同宣使西南行五六日屢見山上有雪山下

往往有墳墓又二三日過曷刺肖故城又五六日踰嶺

而南迤邐南山望之有雪此地東距陸局河約五千里

七月二十五日至阿不罕山北鎮海相公來謁阿不罕

山東北今阿集爾罕山也鎮海傳太祖屯田於八月傍

阿魯歡立鎮海城阿魯歡即阿不罕之音轉抵

大山西行約三日復東南行過大山經大峽中秋日抵

金山東北其山高大深谷長坂車不可行三太子出軍

始闢其路縣轅以上縛輪以下約四程連度五嶺南出

山前臨止泊傍大山者即傍阿爾泰山之東大幹也乃

向西南行當取道於今科布多再西南乃

科布多河及額爾齊斯河發源處爲阿爾泰山之脈脊

故曰經大峽抵金山東北也南出山臨河當是烏隆古

河劉郁西使記謂之龍骨河渡河而南經小童山七十里又鹵地三

十里宣使與鎮海議曰此地最難行前至白骨甸行二

百里達沙陀北頗有水草更涉沙陀百餘里方及回紇

城所謂白骨甸者古之戰場疲兵至此百無一還頃者

乃滿部大敗於此須暮起夜渡其半明日向午方得水

草但黑夜魑魅爲祟當塗血馬首以厭之師笑不答徐松

日金山東北與烏魯木齊所屬之古城南北相直今白

科布多赴新疆驛路南抵古城之鄂倫布之拉克台之

蘇吉台之噶法台皆沙蹟卽白骨甸也翌日過沙陀南望天際若銀霞疑

爲陰山八月二十七日抵陰山後回紇交迎至小城北

告曰、此陰山前三百里和州也、翌日、沿州西行、禾麥初熟、西卽驚思馬大城、回紇王部族勸葡萄酒、供花果、告曰、此大唐時北端州府、景龍三年、楊公何爲大都護、有龍興西寺、二石刻紀其功德、其東數百里有西涼府、其西二百餘里、有輪臺縣、唐之邊坊、往往尙存、此陰山非山乃天山也、博克達三峯、去古城北數日程、卽見之、故長春詩有三峯並起、插雲寒之句、其陰山前三百里和州者、謂天山以南、吐魯番爲古火州地、譌火爲和耳、唐北庭大都護府、在今濟木薩之北、端州者、端卽都護字之合音、翰臺縣治、在今阜康縣西五六十里、縣治在博達克山背、故南望陰山、程同文曰、驚思卽別失歐陽圭齋曰、北庭今別失八里也、則元時別失八里正在於此、九月七日西行、問更幾程

得至行在皆曰西南更行萬餘里卽是四日宿事畢之

東又歷一城重九日至回紇昌八刺城其王畏午兒與

鎮海有舊率部族遠迎源案畏午兒卽畏吾兒乃回鶻轉音也元初畏吾兒地西接伊

犁東抵哈密故此有其酋長程同文曰昌八刺城卽元

史西北地里附錄之彰八里也耶律希亮傳踰天山至

北庭都護府二年至昌八里城夏踰馬納思河則昌八里在今瑪納斯河之東矣翌日並陰山

而西約十程又度沙場一晝夜方出蓋白骨甸大沙分

流也南際陰山之麓踰沙又五日宿陰山北詰朝南行

長坂七八十里翌日又西南行二十里忽有大池方圓

幾二百里雷峯環之倒影池中師名之曰天池徐松曰沙場者

晶河城東至托克多積沙成山東距阜康千一百里故  
云十餘程其間當過數小河此不言者夏雪融則漲冬  
則涸此九月過之故不知有水也自托克多至晶河山  
行五百餘里至養喇木泊東岸泊正圓周百餘里即天  
池沁池正南下左右峯巒流入峽曲折六七十里二

太子扈從西征始鑿石理道刊木爲四十八橋橋可行

車並泊南行五千里入塔勒奇山峽諺曰果子溝溝水  
南流勢甚湍急架木橋以度車馬峽長六十里今爲

四十二橋即其遺址翌日方出入東西大川次及一程至阿里馬

城鋪速滿國王暨蒙古塔刺忽且來迎宿於西果園土

人呼果爲阿里馬因以名城東西大川即今阿里瑪圖河也阿里馬元史作阿力

麻里即伊犁城也元史又作葉密里又作葉密立皆即此城本朝名之曰伊犁以唐書伊列河得名恐亦即葉

密立之音轉

又西行四日至答刺速河土人呼河爲沒聿云

水勢深闊從東來抵西北截斷陰山河南復是雪山十

月二日乘舟以濟南下至一大山北有小城

此卽今伊犁河也其

水西流以西行四日計之其渡河當在今之察林渡也南下一大山疑今鉛廠諸山

又西行五日

宣使劉仲祿以去行在漸近先往馳奏獨鎮海公從又

西行七日度西南一山遇東夏使回言七月十二日辭

行在上將兵追筭端汗至印度

西南一山當是善塔斯嶺筭端者西域長君之

稱元史作筭端明史作速檀一作瑣檀

本朝官書作

種勒坦今哈薩克布魯特每稱之七月十二日辭行在十月十四日至明日至回紇小城十有六日西南遇板

此在道三月矣

橋渡河晚至南山下卽大石林牙其國王遼後也自金師破遼大石林牙領眾數千去西北移徙十餘年方至此地風土氣候與漠北不同平地多農桑果實如中國惟夏秋無雨皆資灌溉東北西南左山右川延袤萬里傳國幾百年乃滿失國依大石土馬復振盜據其土繼而算端西削其地天兵至乃滿尋滅算端亦亡

源案前記言西

南至尋思千城萬里外回紇最佳處契丹都焉歷七帝者此也劉仲錄言在乃蠻奉詔徵師者亦此也大石林牙遼宗姓於遼亡後率眾西行間關萬里建國西土是爲西遼耶律大石號德宗改爲延慶二年康國十年子夷列立號仁宗其幼時太后蕭氏權國改元咸清凡七年及親政改元紹興凡十三年卒子幼妹耶律氏權國



崇福十四年子直魯古立改元天禧凡三十四年元太祖滅乃蠻禽太陽汗其子屈出律奔契丹襲執天禧尊爲太上皇纂其國閱十餘年元太祖征西域滅之其事附見遼史天禧紀末兼見於契丹國志實止建國七十年恩三帝二后以遠隔蔥嶺故諸史皆無之此地尙在伊犁西境未逾蔥嶺也時乃蠻部據其蔥嶺東地而印度算端據其蔥嶺西地分爲兩國其尋思十有八日訟干城則印度算端所據也舊皆西契丹地山而西七八日山忽南去一石城當途石色盡赤有駐軍古迹西有大塚若斗星相聯今時穆爾圖泊南岸也多古翁仲卽此地也自渡伊犁河以南所經之程卽今伊犁兵赴喀什噶爾所防之路傍特穆圖泊東南經布魯特游牧乃上蔥嶺也並西南山行五程至塞藍城有小塔回紇王來迎入館十一月四日土人以爲年傍午相賀西南復三日至一

城其王亦回紇明日又歷一城復行二日有河是爲霍

蘭河由浮橋渡泊於西岸其河源出東南二大雪山間

色渾而流急深數丈西北注不知幾千里此正踰蔥嶺之路也程同

又曰賽藍據劉郁西使記在塔刺寺西四日程今塔刺

河之西也明史外國傳賽蘭在塔失干之東今塔失干

城在錫林河之北元時西域往返之道必從塔刺斯河

過賽蘭乃西南行渡霍蘭河即納林河也劉郁西使記

在忽率河其音相近河之西南絕無水草者二百餘里復南望大

雪山而西山形與邪米思干之南山相首尾又至一城

得水草復經三城山行半日入南北平川仲冬十有八

日過大河至邪米思干大城之北西契丹之河中府也

大師移刺國公及蒙古回紇郊迎大設帷帳乃知宣使  
劉公以路梗尙畱此處蓋千里外舟梁爲土寇所毀也  
遂畱過冬其城臨河岸秋夏常無雨國人疏二渠入城  
分遶巷陌方算端未敗時城中十萬餘戶今存四之二  
大半回紇人契丹及漢人次之有岡高十餘丈算端之  
新宮據焉又孔雀大象皆東南數十里印度國物邪米  
元史及西史記皆作尋思干卽賽馬爾罕城在今散罕  
境內在納林河之南長春自北來先渡霍闊河此又渡  
大河至邪米思干城者應指城東之河北流入那林河  
者也自北庭至此大率西行過此則大率南行最爲西  
征扼要之地故於此宿兵而以耶律楚材駐守焉其後  
以封駟馬帳木兒至明尙爲西域大國源案元史太祖

先取尋思千城後取薛迷思千師因問五月朔日食事

城則誤作二地薛迷卽邪迷也

其人云此中辰時食至六分止師曰前在陸局河時午

刻見其食旣又西南至金山人言已時食至七分此三

處所見各不同以理揆之正當其下則見其食旣在旁

者則千里漸殊耳是年閏十二月將終宣使所遣偵騎

回言二太子發軍滅土寇整橋梁帝蹕大雪山之東

南今則雪積山門百餘里深不可行今開此路請師師

作詩有陰山西上五千里大石東過二十程之句壬午

年春三月

壬午元太祖十七年宋寧宗嘉

阿里鮮至自

定十五年金宣宗元光元年

行宮來迎師問阿里鮮程途幾何對曰春正月十三日  
自此初發馳三日東南過鐵門又五日過大河二月初  
去東南過大雪山積雪甚高馬上舉鞭測之猶未及其  
半下所踏者復五尺許南行三日至行宮矣三月十五  
日同劉宣使啟行四日過碣石城傳旨以甲士千人衛  
送過鐵門東南度山山勢高大亂石縱橫眾軍挽車兩  
日方至前山沿流南行軍卽北入大山破賊五日舟渡  
小河七日舟濟大河卽阿母河也碣石元史地理志作  
柯傷明史外國傳作  
渴石云南傍大山屹立出峽口有石門色似鐵唐西域  
記出錢門至覲賀羅國其地東拒蔥嶺西接波刺斯南

踰大雪山北據鐵門過雪山爲濫波國卽北印度境是也太祖追北印度算端南踰雪山已親至北印度太祖旋師後復遣將追至忻都窮及申河算端死乃返則兵亦至中印度界矣前阿里鮮赴行在時正太祖追算端至印度之日故踰雪山南又三日乃達乃長春至行在則帝已回至雪山避暑故長春過鐵門後行十二日至雪山而止也所渡之阿母河元史亦作暗布河亦作阿木河元秘史作阿梅河卽佛書之縛芻河發源蔥嶺大龍池西北流入裏海者其後於阿母河立元帥府統蔥嶺以西各國大雪山今爲和羅三托山自東而西縣亘里東南行又四日達行在時四月五日也上恐印度迤南炎熱故於雪山避暑上下四月十五日開道將至期有報回紇山賊指斥者上欲親征因改卜十月吉師乞還舊館臨時再來乃以千餘騎由他路回遂歷大山山

有石門望如削堵有巨石橫其上若橋其下流甚急此

地蓋門口新爲兵所破師出峽詩有水北鐵門猶自可

水南石峽更堪驚之句源案阿母河之南雪山之北其

度河上游也印度河亦名新頭河法顯傳曰度蔥嶺西

南行十五日其道艱阻崖岸險絕其山惟石壁立千仞

臨之目眩下有水名新頭河昔人有鑿石通路躡懸絕

過河兩岸相去八十步過河便到烏菴國卽北天竺也

水經注曰烏菴之西有懸度之國案漢烏菴今巴達克

山國也懸度更在其西則河之下游此石峽則河之上

游征西人回多獲珊瑚有從官以白金二鎰買五十株

高者尺餘源案職方外紀蔥嶺迤西有國曰得白德者

之西水皆紅色相傳珊瑚所映而成五月五日復回耶米思干城八月八

日復啟行詣行在十有二日過碣石城翌日步騎千餘  
入大山中行卽鐵門外別路也涉紅水澗有峻峯高數  
里向東南行山根有鹽泉流出見日卽成白鹽又東南  
上分水嶺西望高澗若冰皆鹽耳十有四日至鐵門西  
南之麓將出山其山門險峻左崖崩下澗水伏流一里  
許中秋抵河上其勢若黃河流乘舟以濟東南行三十  
里乃無水源案此又過阿母河也卽夜行過班里城甚大東行數  
十里有水馬僅能渡源案此又過印度河上游也二十二日至行在  
入見道人見帝無跪拜禮入帳折身叉手而已二十七



日從車馬北回九月朔渡河橋而北鹽泉在鐵門山之西其西北即大鹽池元史郭寶王傳太祖封大鹽池爲惠濟王劉郁西使記過納商城滿山皆鹽如水晶狀納商即渴石也越三日出山抵河上其水勢若黃河西北流者即流入大鹽池蓋蔥嶺西之水皆會于此即阿母河南懷仁圖言裏海之水浩蕩甚鹹或以受此河之故歟東行數十里復渡一河則即渡河之上源也九月朔復渡河橋北還者即阿母河之浮橋前爲賊毀官軍修復之蓋長春已見帝即扈從而北矣讀此記乃知元史本紀及耶律楚材傳帝至東印度駐鐵門關角端見班師者蓋本於宋子貞所作楚材神道碑不知太祖軍踰雪山止至北印度何由遽及瀕海之東印度若鐵門則距雪山北印度尙遠考湛然集楚材在西域十年止駐尋思干城縱或偶至鐵門無由至印度神道碑欲歸功楚材故移印度之事於鐵門以傳會之不知種種不合

明史撒馬兒罕即漢罽賓地此語誤沿王圻續文獻通考之謬賽馬爾堪城沿納

林河今在敖罕西北塔什干西南則是古大宛大夏隋地敖罕布哈爾皆元撒馬爾罕所轄地與屬賓無涉唐皆通中國元太祖蕩平西域盡以諸王駙馬爲之君長易前代國名以蒙古語始有撒馬兒罕之名去嘉峪關九千六百里元末爲之王者駙馬帖木兒洪武中太祖欲通西域屢遣使招諭而遐方君長未有至者二十一年四月帖木兒首遣回回滿剌哈非思等來朝貢馬十五駝二詔宴其使賜白金十有八錠自是頻歲貢馬駝及鑕鐵刀劍甲冑諸物而其國中回回又自驅馬抵涼州互市帝不許令赴京鬻之元時回回徧天下及是居

甘肅者尙多詔守臣悉遣之於是歸撒馬兒罕者千二百餘人二十七年八月帖木兒貢馬二百其表言欽仰聖心如照世之杯使臣心中豁然光明照世杯者其國舊傳有杯光明洞澈照之可知世事故云成祖踐阼遣使敕諭其國永樂三年傳安等尙未還而朝廷聞帖木兒假道別失八里率兵東勅甘肅總兵官宋晟儆備五年六月安得還初安至其國被畱朝貢亦絕尋令人導安徧歷諸國數萬里以誇其國廣大至是帖木兒死其孫哈里嗣乃遣使臣送安還貢方物帝厚賚其使遣官

往祭故王而賜新王及部落銀幣其部落頭目沙里奴兒丁等遂亦貢駝馬景泰七年貢玉石天順元年命都指揮馬雲等使西域勅獎其鎖魯檀賜綵幣令護朝使往還鎖魯檀者君長之稱猶蒙古可汗也成化中其鎖魯檀偕亦思罕各酋長貢二獅至肅州其使者還不由故道赴廣東又多買良家女爲妻妾又請泛海至滿刺加市狻猊以獻市舶中官韋眷主之布政使陳選力陳不可乃已宏治二年其使由滿刺加至廣東貢獅子鸚鵡諸物守臣以聞禮官耿裕等言南海非西域貢道卻

之薄犒其使量以綺帛賜其王明年又偕土魯番貢獵  
子及哈刺虎諸獸由甘肅入嘉靖十二年偕天方土魯  
番入貢稱王者至百餘人禮官夏言等論其非請勅閣  
臣議所答張孚敬等言西域諸王疑出本國封授或部  
落自相尊稱先年亦有至三四十人者若驟議裁革恐  
人情觖望乞敕禮兵二部詳議於是言及樞臣王憲等  
謂西域稱王者止土魯番天方撒馬兒罕如日落諸國  
稱名雖多朝貢絕少宏正間土魯番十三人貢正德間  
天方四人貢稱王者率一人多不過三人餘但稱頭目

而已至嘉靖二年八年天方多至六七人土魯番至十一二人撒馬兒罕至二十七人孚敬等言三四十人者并數三國爾今土魯番十五王天方二十七王撒馬兒罕五十三王實前此所未有宏治時回賜敕書止稱一王若循撒馬兒罕往歲故事類答王號八與一敕非所以尊中國制外番也帝納其言國止給一敕且加詰讓示以國無二王之義然諸番迄不從十五年入貢復如故計嘉巡撫趙載奏諸國稱王者至一百五十餘人皆非本朝封爵宜令改正且定貢使名數通事宜用漢人

毋專用色目人致交通生靈後人貢迄萬曆中不絕蓋  
番人善賈貪中華互市既入境則一切飲食道途之資  
皆取之有司雖定五年一貢迄不肯遵天朝亦莫能難  
也其國東西三千餘里地寬平土壤膏腴王所居城廣  
十餘里民居稠密西南諸番之貨多聚於此號爲富饒  
城東北有土屋爲拜天之所規制精巧柱皆青石雕爲  
花文中設講經之堂用泥金書經裏以羊皮俗禁酒人  
物秀美工巧過於哈烈而風俗土產多與之同其旁近  
東有沙鹿海牙達失干賽藍養夷西有渴石迭里迷諸

部落皆役屬焉

達失干即今之塔什干在  
敖罕之北哈薩克之西

又曰迭甲迷在撒馬兒罕西南去哈烈二千餘里有新

舊二城相去十餘里其酋長居新城城內外居民僅數

百家畜牧蕃息城在阿木河東多魚河東地隸撒馬兒

罕西多蘆林產獅子永樂時陳誠李達嘗使其地下花

爾在撒馬兒罕西北七百餘里

案卜花爾在敖罕西即  
今布哈爾也撒馬爾罕

都城在今布哈爾敖罕地斷非漢之屬賓矣屬賓爲今  
克什噶爾且中隔巴達克山等國相去甚遠又有哈爾  
彼時疆域甚小今則盡有撒馬爾罕之地爲大國故城  
以撒馬爾罕爲今之布哈爾古之大夏也乎近貴城

居平川周十餘里戶萬計市里繁華號爲富庶地卑下



節序常溫宜五穀桑麻多絲綿布帛六畜亦饒永樂十三年陳誠自西域還所經哈烈撒馬兒罕別失八里俺都淮八答黑商迭里迷沙鹿海身賽藍渴石養夷火州柳城土魯番鹽澤哈密達失干卜花爾凡十七國悉詳其山川人物風俗爲使西域記以獻以故中國得考焉宣德七年命李達撫諭西域卜花爾亦與焉達失干卽別失八里卽今新疆南路回部八答黑商卽今巴達克山明史哈烈一名黑魯在撒馬兒罕西南三千里當爲今愛烏罕部之去嘉峪關萬二千餘里西域大國也元駙馬帖木

兒旣君撒馬兒罕又遣其子沙魯哈據哈烈洪武時撒馬兒罕及別失八里咸朝貢哈烈道遠不至二十五年遣官詔諭其王賜文綺綵幣猶不至二十八年遣給事中傅安郭驥等攜士卒千五百人往爲撒馬兒罕所留不得達三十年又遣北平按察使陳德文等往亦久不還成祖踐阼遣官齎璽書綵幣賜其王猶不報命永樂五年安等還德文徧歷諸國說其酋長入貢皆以道遠無至者亦是年始還德文采諸方風俗作爲歌詩以獻帝嘉之明年復遣安齎書幣往哈烈其酋沙哈魯巴都

兒始遣使隨安朝貢七年達京師復命齋賜物偕其使  
往報明年其酋遣朝貢撒馬兒罕酋哈里者哈烈酋兄  
子也二人不相能數構兵帝因其使臣還命都指揮白  
阿兒忻台齋敕諭之白阿兒忻台既奉使徧詣撒馬兒  
罕失刺思俺的干俺都淮土魯番火州柳城哈實哈兒  
諸國賜之幣帛諭令入朝諸酋長各遣使貢獅子西馬  
文豹諸物自是諸國使並至皆序哈烈於首及仁宗不  
勤遠略宣宗承之久不遣使絕域故其貢使亦稀至七  
年復命中官李貴通西域敕諭哈烈貴等未至其貢使

已抵京師貢駝馬玉石英宗幼冲大臣務休息不欲倣  
中國以事外番故遠方通貢者甚少天順後朝貢遂絕  
其國在西域最强大王所居城方十餘里壘石爲屋平  
方若高臺不用梁柱瓦壁中徹虛空數十間窗牖門扉  
悉雕刻花文繪以金碧地鋪氊罽無君臣上下男女相  
聚皆席地趺坐國人稱其王曰鎖魯檀猶言君長也男  
髡首纏以白布婦女亦白布蒙首僅露雙目上下相呼  
皆以名相見止少屈身初見則屈一足三跪男女皆然  
食無匕箸有瓷器以葡萄釀酒交易用銀錢大小三等

不禁私鑄惟輸稅於酋長用印記無印者禁不用市易  
皆征稅十二不知斗斛止設權衡無官府但有管事者  
名曰刀完亦無刑法止罰錢以姊妹爲妻妾居喪止百  
日不用棺以布裹屍而葬常於墓間設祭不祭祖宗亦  
不祭鬼神惟重拜天之禮無干支朔望每七日周而復  
始歲以二月十月爲把齋月晝不飲食至夜乃食周月  
始茹葷城中築大土室中置一銅器周圍數丈上刻文  
字如古鼎狀游學者皆聚此若中國太學然有善走者  
日可三百里有急使傳箭走報俗尙侈靡用度無節土

沃饒節候多暖少雨土產白鹽銅鐵金銀琉璃珊瑚琥珀珠翠之屬多育蠶善爲紉綺刑止錘撲交易兼用銀錢獅生於阿木河蘆林中初生目閉七日始開土人於目閉時取之調習其性稍長則不可馴矣其旁近俺都淮入答黑商並隸其國俺都淮在哈烈東北千三百里東北去撒馬兒罕亦如之東北舊誤西北又東北舊誤東南今改正俺都淮與入答黑商相連卽今愛烏罕也安得更在哈烈之西撒馬兒罕之北乎城居大村周十餘里地平衍無險田土膏腴民物繁庶稱樂土自永樂八年至十四年偕哈烈通貢後不復至入答黑商在俺都淮

東北

觀此語可證前段方向之誤蓋巴達克山在愛烏罕東北也

城周十餘里地廣

無險阻山川明秀人物朴茂浮屠數區壯麗如王居西洋西域諸賈多販鬻其地故民俗富饒初爲哈烈酋沙哈魯之子所據永樂六年命內官賜其酋書敕綵幣並及哈實哈兒葛忒郎諸部自是往來通商東西萬里行旅無滯十二年陳誠使其國十八年遣使來貢

皇清四裔考巴達克山居於蔥嶺中其境北至伊西洱河東北去葉爾羌千餘里有城郭其汗曰素爾坦沙部落繁盛戶十萬有奇頭目戴紅氍小帽束以錦帕衣錦

氍衣腰繫白絲縹足穿黑革鞮女則被髮雙垂餘與男子同其民人帽頂制似葫蘆邊飾以皮衣黃褐束白絲縹足穿黑革鞮亦有用黃牛皮者其國負山險扼蔥嶺之右頗擅形勢有河北流經博羅爾巴達克山兩部落之間至伊什得特兒分流一流經北入圖斯泊一流道西又北入於伊西洱泊其北鄙之城曰瓦漢在漢烏秣國地乾隆二十四年八月回部逆酋博羅尼都霍集古爲王師所敗奔巴達克山副將軍富德率師追之二賊方竄入巴達克山之錫克南村詭稱假道往墨克乃



逸去肆掠村落素爾坦沙禽博羅尼都而以兵圍霍集  
占於阿爾渾楚哈嶺賊退保齊那爾河素爾坦沙進戰  
擒之囚於柴扎布柴扎布者布達克山繫囚處也素爾  
坦沙乃遣人詣軍門投款且報二賊就擒副將軍富德  
鑒其忠順遣使者往諭責令獻俘進軍瓦漢以待之是  
時溫都斯坦方以兵臨巴達克山謀劫霍占兄弟而塔  
爾巴斯者巴達克山警國也賊將通之攻巴達克山所  
遣使被獲乃遷霍集占於別室以二百人圍殺之尙以  
二逆酋與已同派噶木巴爾裔欲縛獻恐諸部不從難

之富德反覆曉以順逆利害乃以逆屍馳獻率其部十萬戶與博羅爾部三萬戶俱降四裔考曰漢書皮山國西南至烏秬國千三百

四十里皮山在于闐國西今自和闐西行至巴達克山亦千三百餘里其國居蔥嶺南境四面皆山與班史烏秬國山居之說相合則今之巴達克山在漢爲烏秬國也又魏書載阿鈎羌國在莎車西南西有縣度山漢書亦云烏秬國西有縣度莎車今之葉爾羌在巴達克山東北亦與阿鈎羌國在莎車西南之說合又權於摩國去代一萬二千九百七十里阿鈎羌國去代一萬三千里二國相距止三十里當屬毗聯之境疑漢時統屬烏秬至魏乃分兩國東屬權於摩故去代較近西屬阿鈎羌故獨與縣度相接也唐書不載烏秬權於摩阿鈎羌諸國而有喝盤陀者由疏勒西南六百里至其國今之喀什哈爾古疏勒地西南六百里至巴達克山道里適符城居山內河抱城東所謂沿蔥嶺負徙多河者形勢可驗至元史載有巴達哈傷明史載有入答黑商其音

與巴達克山相近疑卽此地然元史不載遠近道里而  
明自陳誠使西域一至其地名號粗傳天順後絕不復  
至重以中外譯音彷彿同異  
猝難審證聊附存以備考云

又曰博羅爾在巴達克山東有城郭戶三萬有奇四面  
皆山西北面有河乾隆二十四年與巴達克山同時內  
附其南有部落曰溫都斯坦產金絲緞霍集占走巴達  
克山時溫都斯坦方以兵相攻謀劫霍集占不果後其  
部爲愛烏罕所并二十九年正月博羅爾遣使入朝是  
時博羅爾與巴達克山屢行構釁圍城劫掠乞援於駐  
劄葉爾羌都統新柱遣諭巴達克山恪遵約束還俘罷

兵至是進玉櫺雙七首

地球圖說大布加利亞國卽布哈爾也東界新疆南界亞加業坦國并耳西亞國西界裏海北界峨羅斯國其百姓約有五百萬之數都城名布加利城內民八萬大都回回教牧牛馬以馬乳爲酒氍毹爲廬國內有曠野亦名各城皆有書院土產馬駱駝羊絨布果品金珠玉沙漠寶石金剛石等物所進入貨物惟中國之磁器茶葉雜色絨布紬緞少購西洋之物

地理備考曰達爾給斯丹國卽南懷仁圖所謂韃而韃

也斯丹乃西域國王之稱亦名哈薩克國在亞細亞洲西北北極出地三十四度起至五十五度止經線自東四十七度起至八十度止東至天山北路西枕加斯比約海南接白爾西亞阿付于二國北界厄羅斯國之西卑里亞長約五千里寬約三千五百里地面積方約一百七十八萬里烟戶四兆餘口本國地勢東南峯巒峻聳冰雪凝積西北平原坦闊沙漠相間河之長者一名亞木達里一名西爾達里一名薩刺蘇一名主意一名古彎一名加爾齊湖之大者一名亞拉爾又以其過大

而稱海一名德勒斯古爾一名加拜古拉一名加拉古爾一名達蘭一名巴達于的爾田土廕原濱地尤腴穀果草卉禽獸鱗介靡弗蕃衍五金各礦皆備惟鐵開採餘皆禁取土產礬煤寶石紋石礪砂烟葉熟皮藥材等物地氣溫和寒暑俱極諸汗統轄各分部落所奉之教乃回教也工作技藝惟布加拉人善于織造餘皆耕牧爲業貿易興隆商侶結隊而行盜風太劇往來維艱通國半土著半游牧共分二十部落一名布加拉建于平原之中乃通國之最富強者也一名着爾塞波斯一名

伊陸爾一名安該一名美馬墨一名巴爾克一名古爾  
墨一名昆都斯一名達黎干一名巴刺達哥古一名德  
爾瓦斯一名古拉波一名亞比者爾麼一名刺迷以上  
皆土著之部有城郭居室此外則一名加爾札係諸酋  
分部游牧無常處一名加非里斯丹亦諸酋分部游牧  
無常處一名哥干一名其爾意斯土人素稱哥薩克內  
分上中下三部一名其襪一名加刺加爾巴亦諸酋分  
部游牧遷移靡有定居一名都爾各馬尼亞亦諸酋分  
部游牧廬帳徙處不一並無定止

外國史畧曰西域哈薩克游牧國也。葱嶺東西皆有其地。西人稱之曰達達里。亦曰達爾韃。亦曰達爾給。北極出自三十六度及五十一度。偏東自四十三度及七十八度。廣袤方圓三萬二千里。南及罕布地。北及裁羅斯。藩屬國。東及新疆。西及裏海。東南有大山。隔新疆。在北。亦有山。多湖。其味鹹。色如海潮。旱則鹽出。其山麓平地。高於海面二百丈。漸近裏海。勢愈低。亞拉湖之南。有兩野。各廣三十五里。在北之山地。足資游牧。絕無淡水。有沙邱焉。隨時變易。其處中多瀦水。與裡海所連之地。悉



高坦其土磽無產物故居民鮮焉其新疆西北哈薩克  
游牧之地土雖磽尙有牧場亦豐盛然西南甚瘦不生  
草木惟駝克通行焉中有腴地生五穀西域大半皆不  
毛之地其亞母河之泉在三十七度二十七分高於海  
者百五十丈其水西北流無沙線無磐石匯入亞拉湖  
水深能駛船西熏河由天山涌出入亞拉湖哥墨河在  
撒馬耳干地流出兩岸豐盛多物產亞拉湖方圓七千  
里內有淡水非若他湖之盡鹹也哈薩之地多湖悉鹹  
水罕雨多塵所有居民各分種類其土民稱曰他益與

白西人風俗畧同其餘屬土耳其者或烏士百之族類  
共三十二宗派身矮而壯面紅以布包首亦穿靴非若  
他夷之赤足也女則遍身絲緞頗聰明咸奉回回教其  
游牧西方者多此族反覆無常日騎馬恣虜掠四方畏  
之在西北哈薩克之種類或事戡羅斯或服中國野性  
難馴專以搶掠爲事其烏士百之種類則勤耕安分造  
綿布綢緞或帽或紙等貨多使奴皆外國販來者亦有  
五印度國所到之商賈其要市在我羅斯界每年駝千  
三百隻載貨赴市其新疆所來之漢商亦不少貿易興

旺喀什噶爾葉爾羌和闐各商往來者恆不絕焉。西域民多是土耳其蒙古各族類所自出。此時國地已分最大者曰布加拉國。卽布哈爾中央有豐有磽郊外多沙。大麥旱雪連三四月不消。南方曰巴勒與甲布交界。甚熱多瘴癘。其都曰破加拉名邑也。北極三十九度四十二分。偏東六十四度五十五分。連邑之處高於海面百二十丈。居民十五萬。內有書院。回回廟。大房宇。便通商海外之商雲集。奉回回教。其君聽命於國內之教師。東四十里有撒馬爾罕古城。居民萬口。多古蹟。在南方。

巴勒之間亦有古城居民在西方二十里外有鄉邑四百餘處居民甚罕。尹士斯在亞母河之南卽元史之阿母河也谷間甚燥熱居民不多與其隣國補答山職盡有其地卽巴達克山也地產紅玉青金。北方之南有小地是各夷目所管者此地並葉爾羌中間有巴黑坦地高於海三十丈氣候甚冷山阿盛夏猶有雪五穀不登其居民係哈薩克之游牧以肉乳爲食。布加拉東北曰哥干地亦曰敖罕古小國也出蘇花蠶絲與栽羅斯商交易民務農引河灌田甚巧最大之城曰答金

居民八萬與義羅斯國互市○布加拉西及裡海曰其  
五部亦曰機箇其君管土耳其南方游牧雖事耕田亦  
虜賣人口道光二十年統兵二萬往侵義羅斯國凍斃  
大半通市之邑曰阿耳云治其夷目以掠人爲事卻護  
往來商賈以征其餉其居民與義羅斯世仇英人屢勸  
和不果○此地中間及裡海土耳其或曰耳哥曼族類  
遊奕無定處惟養牲畜食肉飲乳無統屬產良馬奔速  
如電居民約十四萬○白西亞交界最豐盛之墨味地  
一種百倍昔屬白西國爲破加拉君攻有其地○北方

哈薩克與蒙古無大分別多奉回教或耕田或遠遊惟冬時則附城邑搭氊帳不畏權勢忽馴忽叛○西域之民多不安分惟嚴務防範以免其肇衅一生戰端則爭鬪不息矣

一統志塔什罕在回部喀什噶爾之北一千三百里東至布魯特界東南至那木干界東北至右哈薩克部界其貢道由回部以達於京師漢爲康居大宛交界之地北魏爲九姓昭武所居隋唐爲安國石國地明達失於國地居平原有城郭向有三和卓分轄回眾曰昭莫

爾多薩木曰沙達曰吐爾占舊爲右哈薩克屬莫爾  
多薩木什者哈薩克所置和卓也吐爾占逐之哈薩克  
以兵問罪久而不解乾隆二十三年參贊大臣富德追  
討哈薩克錫拉至其地遣使撫定塔什罕回眾時吐爾  
占方與右哈薩克戰於河上因諭以睦鄰守土之道乃  
大感悟與哈薩克釋爭相睦卽遣使奉表求內屬先是  
有準噶爾部逸賊額什木札布在其境內卽擒以獻其  
年遣使來朝貢塔什罕之西南行數百里踰錫爾河又  
踰那林河

二河見右哈薩克部及霍罕部

爲賽瑪爾堪城又西南爲噶

拉克則城又西爲烏爾根齊城又西爲臨達里岡阿泊是爲西海西境於是盡焉塔什罕城居平原多園林饒果木土宜五穀居民稠密當葱嶺直北四百里外

一統志霍罕東與布魯特錯處西至哈什干南至葱嶺北至那林河那林河在葱嶺西北經流數千里霍罕安集延諸國瀕之以居大小泉源支流不一並會此河其發源從布魯特境西行過安集延城之北又西行過瑪爾哈朗城又西行過賽瑪爾堪城之北

可證賽瑪爾堪即敖罕地

折東南入於達里岡阿泊廣千餘里爲西境巨海無



有涯際凡蔥嶺以西之水咸歸之漢甘英窮臨西海卽

此水也

案此誤以鹹海爲地中海也

史記大宛傳大宛在匈奴西南

在漢正西去漢可萬里有城郭屋室其屬邑大小七十餘城漢書西域傳大宛國王治貴山城去長安萬二千五百五十里東至都護治所四千三十一里北至康居卑闐城千五百一十里南至大月氏六百九十里北與康居南與大月氏接別邑七十餘城多善馬北魏曰洛那國唐曰拔汗那國天寶初改名甯遠國

一統志布哈爾在拔達克山西二千餘里其貢道由回

部以達於京師漢爲難兜國自後無聞乾隆二十五

年回部底平遣使頒勅諭二十九年其部長因拔

達克山素爾坦沙額請以其屬內附漢書西域傳難兜

國王治去長安萬一千五百里東北至都護治所八百

九十里西南至尉賓三百三十里按漢書載烏秬國西

與難兜接烏秬爲今之拔達克山難兜爲今之布哈爾

其地位遠近正相值也源案布哈爾一作布噶爾當巴達克山西北正包敖罕西境拔

罕爲大宛則布哈爾爲大夏無疑也且難兜非大國又

不在大宛之西決非其地史記月氏爲匈奴所破乃遠

去西擊大夏而臣之大夏在大宛西有二千餘里媯水

南媯水疑卽今之納林河今敖罕雖古大宛地然止入

城不足全當大宛而布哈爾包敖罕  
三面屬城百餘則兼有大宛西境矣

西域聞見錄曰塞克西域一大國也在敖罕西絕非回

子種類

敖罕西則布哈爾也布哈爾正回教後裔此全誤

稱其王曰汗部落數

百處各有統轄之人皆其汗之阿拉巴圖事權歸一無

政扈叛弑之事城池巨麗人民殷庶居室寬敞整潔人

家院落中各立木竿向之禮拜冬夏和平風俗坦白尙

宴會喜歌舞人多力善射發必命中佩標鎗五枝長四

五尺取物於百步之外與敖罕稱勦敵也敖罕西境勦敵舍布哈爾

其椿園氏曰塞克西域最遠之國去葉爾羌二萬餘里

既云接放罕西境則去葉爾羌亦不過二三千里卽至鄂羅斯界亦不過五千餘里安得荒遠至此松筠奏疏言放罕西有布哈爾大國統屬百餘城西北與俄羅斯介鄂羅斯哈罕之間不應更有他國也西北與俄羅斯隨穆接壤或曰興阿喇克等國犬牙相錯大抵皆世俗所傳之大西洋也然而塞克之邦風樸民淳人無欺詐尙氣節敦廉恥不得以荒遠而鄙夷之矣源案阿喇克音轉塞克卽薩克之音轉蓋布哈爾卽西哈薩克國乃誘而爲阿喇克又誘而爲塞克遂分一國爲三國矣哈薩克有四大部左哈薩克其東部右哈薩克塔什干其中部布哈爾其西部也此三部外尙有北哈薩克近鄂羅斯不通中國疑卽此所謂阿喇克者歟左右二部爲古康居西北二部爲古大夏而分有大宛西境明時爲賽馬爾罕地自明末賽馬爾罕分裂放罕得其十之三布哈爾得其十之七近日布哈爾又滅放罕而有之則

兼井大宛大夏之域矣

西域水道記塞勒庫勒在葉爾羌城西八百里爲外蕃總會之區達外蕃凡三道自塞勒庫勒南十四日程曰巴勒提又東南一日程至其屬邑曰哈普倫哈普倫南十六日程曰土伯特卽藏地也巴勒提西南二十九日程曰什克米爾地出研蠟紙又西南四十三日程曰痕都斯坦善鏤玉以上皆各自爲部不相屬自塞勒庫勒西五日程曰黑斯圖濟又西南三日程曰乾竺特歲貢金一兩五錢又西四日程曰博洛爾其地南卽巴勒提

曾貢劒斧七首，乾隆三十四年，特西北九日程，曰拔達克山，其汗素爾坦沙獻霍集占首，貢刀斧八駿，又北五日程，曰塔木干，又北三日程，曰差雅普，又西南三日程，曰渾渚斯，又西北三日程，曰塔爾罕，與噶斯呢爲鄰，曰黑斯圖濟，至塔爾罕，皆噶勒察種也，博洛爾西二十日程，曰愛烏罕，亦曰喀布爾，乾隆二十七年，其酋愛哈默特沙攻狼都斯坦，殺其汗，其子逃竄，愛哈默特沙取扎納巴特城，以伯克守之，自居拉固爾城，又統至固珠喇特，攻克什米爾，執其頭，曰塞克專，二十八年，貢刀及四駿，其屬邑

日拉虎爾距葉爾羌六十二日程自塞勒庫勒北三日  
程曰滾又西北二日程曰幹罕又西北二日程曰差特  
拉勒分二道北一日程曰羅善西一日程曰什克南乾  
隆中有與葉爾羌阿奇木伯克鄂對爲仇肆凶暴名曰  
沙關機者卽什克南頭目也又西北二日程曰達爾瓦  
斯自滾以下亦噶勒察種達爾瓦斯北爲喀爾提錦部  
布魯特羅善北爲霍罕霍罕城距東南塞勒庫勒十日  
程其屬城曰瑪爾噶浪在東北一日程曰安吉延在東  
北三日程曰窩什在東南八日程曰納木干在西南二

日程曰塔什罕在西北四日程曰科拉善在西北五日程曰霍占在西南五日程其大伯克自稱曰汗居霍罕城其塔什罕城舊爲舍氏和卓與摩羅沙木什二人分治舍氏和卓漸強摩羅沙木什被其侵奪訪與霍罕乞師復還侵地舍氏和卓又會西哈薩克攻殺摩羅沙木什二子額爾德呢遂攻塔什罕丕色勒來援哈薩克後得之終入霍罕霍罕與回部分界處有二嶺曰噶布蘭曰蘇提布拉克額德格納部布魯特居之嶺東爲回布嶺西爲霍罕霍罕西十五日程曰布哈爾亦大國東南



距塞勒庫勒三十二日程其屬城曰鄂勒推帕在東七  
日程曰濟雜克在東三日程曰拜爾哈在東北三日程  
曰噶斯呢在西南十日程曰坎達哈爾在西南二十日  
程

職方外紀中國之北迤西一帶直抵歐羅巴東界俱名  
韃而韃其地江河絕少平土多沙大半皆山大者曰意  
貌中分亞細亞之南北其西北皆韃而韃種也案意貌  
山既最  
大自當指蔥嶺言之當云中分亞細亞洲之東西原本  
作南北誤也若指阿爾泰山北幹言之則蒙古游牧部  
落在其南不皆在山北或指天山言之則又不能西抵  
歐羅巴洲觀上文中國迤西一帶則南北字當爲東西

之誤明矣。韃靼卽蒙古達子，又卽達達里，皆謂游牧部落特譯音小殊耳。氣候極寒，冬月無雨，入夏微雨，僅濕土而已。人性好勇，以病歿爲辱。人罕得遍歷其地，亦無文字相通，故未悉其詳。然大率少城郭，居室駕屋於車，以便遷徙。產牛羊駱駝，嗜馬肉，以馬頭爲絕品。貴者方得噉之，道行飢渴，卽刺所乘馬，瀝血而飲，復嗜酒，以一醉爲榮。此外諸國更有殊異不倫，如夜行晝伏，身蒙鹿皮，懸尸於樹，喜食蛇蟻蜘蛛者；有人身羊足，氣候寒極，夏月膚冰二尺者；有長人善躍，一躍三丈，履水如行陸者；人死不事棺槨，衣衾殯殮瘞埋，且

有謂不忍委之邱隴者此皆其國俗之殊異者也迤西  
舊有女國曰亞瑪作搦最驍勇善戰嘗破一名都曰厄  
弗俗卽其地建一神祠宏麗奇巧殆非思議所及西國  
稱天下有七奇此居其二國俗惟春月容男子一至其  
地生子男輒殺之今亦爲他國所併卽諸史所謂西  
女國也今爲他國所并者謂并於南都魯機也又有地曰得白得不以金銀爲  
幣止用珊瑚卽長春西遊記在蔥嶺西之大雪山見太  
官以白金二錢買五十株高者尺餘是其證也又以至大剛國惟屑樹皮爲餅  
如錢印王號其上以當幣其俗國主死後輿棺往葬道

逢人輒殺之謬謂死者可事其主嘗有一王會葬殺人無數此其西北之國俗然也

又曰中國之西北出嘉峪關遇哈密土魯番曰加斯加爾多高山產玉石二種出水中者極美出山石中者以薪火燒石迸裂乃鑿取之甚費工力牛羊馬畜極多因不啖豕諸國無豕自此以西曰撒馬兒罕曰革利哈大藥曰加非爾斯當曰杜爾格斯當曰查理曰加本爾曰古查曰蒲加刺得皆回回諸國也其人多習武若商旅防寇非聚數百不可行亦有好學好禮者初宗馬哈默

之教諸國多同，後各立門戶，互相排擊，持戒亦有數端。其大者在不得辯論教中事，謂教如此立，則當冥心順受。雖理有未安，弗顧也。案杜爾格卽度爾格，凡言斯當者卽斯單之音轉，或作斯坦，或作土丹，或作速檀，或作算端，皆西域酋長之稱也。

萬國地里全圖集曰：蔥嶺以西與中國交界，南及加布白西等國，北至俄羅斯藩屬國，東接新疆，西至甲片湖北極，出自三十五度至五十五度，偏東自五十五度至七十五度。

紀昀閱微草堂筆記曰：海中三島十洲，崑崙五城十二

樓詞賦家沿用久矣。朝鮮、琉球、日本諸國皆能讀華書。日本余見其五京地志及山川全圖，疆界袤延數千里，無所謂仙山靈境也。朝鮮、琉球之貢使，則余嘗數數與談，以是詢之，皆曰：東洋自日本以外，大小國土凡數十，大小島嶼不知幾千百，中朝人所必不能至者，每帆檣萬里，商船往來均不聞有是說。惟琉球之落際，似乎三千弱水，然落際之舟偶值潮平之歲，時或得還，亦不聞有白銀宮闕可望而不可卽也。然則三島十洲豈非純構虛詞乎？爾雅史記皆稱河出崑崙，攷河源有二，一出

和闐一出蔥嶺或曰蔥嶺其正源和闐之水入之或曰和闐其正源蔥嶺之水入之雙流既合亦莫辨其誰主誰賓然蔥嶺和闐皆在今版圖內開屯列戍四十餘年卽深崖窮谷亦通耕牧不論兩山之水孰爲正源兩山之中必有一崑崙確矣而所謂瑤池懸圃珠樹芝田槩乎未見槩乎未聞然則五城十二樓不又荒唐矣乎不但此也靈鷲山在今拔達克山諸佛菩薩骨塔具存題記梵書一一與經典相合尙有石室六百餘間卽所謂大雷音寺回部游牧者居之我兵追捕波羅泥都霍集

占嘗至其地，不過如斯種種莊嚴，似亦藻繪之詞矣。相傳回部祖國，以銅爲城，近西之回部云銅城在其東萬里，近東之回部云銅城在其西萬里，彼此遙拜，迄無人曾到其地，因是以推恐南懷仁坤輿圖說所記五大洲珍奇靈怪，均此類焉耳。

源案蓬萊方丈，始自秦漢方士，史書之以見其妄，未有信之爲實者。何勞考辨？惟梁書言毗塞國王在南海中，去扶南八千餘里，其國王自古至今長生不死，能作天竺書二千餘言，與扶南王相報，說其宿命所



由與佛經相似此則明載正史確鑿可徵乃自明以來西洋商船無島不通遠窮南極曾有此島嶼乎止當辨毘騫不當辨十洲三島也崑崙之爲蔥嶺無疑其地產玉又上有龍池故玉山瑤池之說尙非無因至靈鷲山在中印度爲今之痕都斯坦其北之克什彌爾始爲北印度又北始爲拔達克山則並非北印度境距中印度境則數千里乃謂諸佛菩薩骨塔具存殆同兒戲至大雷音寺出西游演義並非釋典何得回疆真有其寺耶回部祖國爲天方阿丹默德那

等地在西印度西紅海之間明史載其職貢 本朝  
通其商舶粵中所謂港腳白頭回子卽其部類也其  
地有教祖穆罕默德之墓墓前有元石凡各國回人  
皆歲往禮拜焉在西藏之西八千餘里見明史回  
回麻論并  
非渺茫之域豈有彼地回人舍其聖祖陵墓而向東  
禮拜之理耶筆記雖小說家言然紀文達貢張華博  
物之名恐惑觀聽故錄而辯之